



Sud Bosne i Hercegovine
Суд Босне и Херцеговине

Broj: S1 3 Iž 049128 24 Iž
Sarajevo, 19.08.2024.godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija Mirsade Džindo, kao predsjednika vijeća, Zvezdane Antonović i Redžiba Begića, kao članova vijeća, odlučujući o žalbi političke stranke NES BiH-Narodni evropski savez BiH, sa sjedištem u Sarajevu, ul. Obala Kulina bana 24/2, koju zastupa predsjednik stranke mr. Nermin OGREŠEVIĆ, izjavljenoj protiv Odluke Centralne izborne komisije Bosne i Hercegovine broj: 05-1-07-5-1465/24 od 08.08.2024. godine, o utvrđivanju odgovornosti za vođenje preuranjene izborne kampanje, u nejavnoj sjednici, održanoj dana 19.08.2024. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, i to stavom 1. utvrđeno je da je politička stranka NES BiH-Narodni evropski savez BiH odgovorna što je putem društvene mreže Facebook vodila izbornu kampanju u periodu preuranjene izborne kampanje, čime je prekršila pravila ponašanja u izbornom periodu iz člana 7.1 Izbornog zakona BiH, pa joj je na osnovu člana 6.7 stav 2. tačka 1) Izbornog zakona BiH i primjenom člana 19.9 stav 1. tačka 3) Izbornog zakona BiH izrečena novčana kazna u iznosu od 3.000,00 KM (tri hiljade konvertibilnih maraka). Stavom 2. je određeno da će se novčana kazna uplatiti u roku od 8 dana na račun Ministarstva finansija i trezora BiH, dok je stavom 3. naloženo je političkoj stranci NES BiH-Narodni evropski savez BiH da ukloni sa društvene mreže Facebook (NESBIH-Općinska organizacija Velika Kladuša) sporne objave za koje je CIK BiH izrekla novčanu kaznu, te da sve pristalice i kandidate ove političke stranke za predstojeće Lokalne izbore 2024. godine, obavijesti da su dužni da se suzdrže od javnog oglašavanja i vođenja izborne kampanje u elektronskim, onlajn i štampanim medijima i putem društvenih mreža ili bilo kojeg oblika javnog oglašavanja kampanje prije zvaničnog početka izborne kampanje.

Protiv navedene odluke Centralne izborne komisije (u daljem tekstu CIK BiH)

žalbu je blagovremeno izjavila politička stranka NES BiH-Narodni evropski savez BiH zbog pogrešne primjene materijalnog propisa. Navodi da je CIK BiH u obrazloženju odluke naveo da je dana 11.07.2024. godine, zaprimio prijavu od OO SDA Bužim u kojoj je navedeno da su dana 01.02.2024. godine promovisali Adisa Džanića kao potencijalnog kandidata za načelnika Općine Velika Kladaša i time prekršili odredbu 7.1 Izbornog zakona BiH, te da je navedeni skup objavljen na zaslону zvaničnih profila NES BiH i OO NES Velika Kladaša. Nesporna je činjenica da se predmetni događaj desio na dan 01.02.2024. godine, ali kako su Lokalni izbori raspisani dana 08.05.2024. godine, to ova objava ne može smatrati preuranjenom kampanjom. Predlaže da Apelaciono vijeće Suda BiH u cijelosti uvaži žalbu kao osnovanu, te ukine Odluku CIK BiH kao nezakonitu.

U odgovoru na žalbu Centralna izborna komisija Bosne i Hercegovine je predložila da se žalba odbije kao neosnovana.

Žalba nije osnovana.

Iz stanja spisa proizlazi da je CIK BiH dana 11.07.2024. godine putem e-maila zaprimila prijavu od OO SDA Bužim sa dokazima (fotografije i snimak ekrana sa Facebook stranice), da je politička stranka NES BiH odgovorna za kršenje odredbe člana 7.1 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), na način da je OO NES Velika Kladaša dana 01. 02.2024. godine održala politički skup i tom prilikom najavila da će ih na predstojećim Lokalnim izborima za načelnika Velike Kladaše predvoditi Adis Džanić, kao i da je političkom skupu i predstavljaju kandidata prisustvovao predsjednik Narodnog evropskog saveza BiH Nermin Ogršević, koji je pozvao građane Velike Kladaše da se pridruže timu koji se okuplja oko Adisa Džanića i svakodnevno jača i da će NES s ponosom podržati buduću kandidaturu koja u Velikoj Kladaši donosi promjenu, napredak i puno rada za sve njene građane. Dalje je navedeno da je takvom promocijom kandidata Narodnog Evropskog Saveza BiH i OO NES Velika Kladaša zloupotrebjen zvanični profil i funkcija predsjednika NES BiH i OO SDA Velika Kladaša, jer su obavili predizborni skup na kojem su promovisali kandidaturu za načelnika Općine Velika Kladaša.

CIK BiH je predmetni prigovor ocijenila kao inicijativu za pokretanje i vođenje postupka po službenoj dužnosti u smislu odredbe člana 6.2 stav 2. Izbornog zakona BiH, te je isti dostavila žalitelju na izjašnjenje. Žalitelj u izjašnjenju nije osporavao postojanje sporne objave na društvenoj mreži Facebook, nego je osporavao činjenicu da se ne radi o preuranjenoj kampanji iz razloga što su Lokalni izbori raspisani 08.05.2024. godine, a predmetna objava je bila 01.02.2024. godine.

„Preuranjena kampanja“, u smislu odredbe člana 1.1a tačka 8. Izbornog zakona Bosne i Hercegovine, je svaki oblik radnji iz kampanje koje preduzimaju

2

politički subjekti u periodu od raspisivanja izbora do perioda zvaničnog početka izborne kampanje.

Odredbom člana 7.1 Izbornog zakona BiH je propisano da u periodu preuranjene izborne kampanje zabranjeno je vođenje izborne kampanje u elektronskim, onlajn i štampanim medijima i putem društvenih mreža ili bilo koji oblik javnog oglašavanja kampanje. Ova zabrana ne odnosi se na organiziranje zakonitih zvaničnih skupova organa i događaja političkih subjekata u svrhe koje nisu kampanja.

Nadalje, odredbom člana 9. stav 1. Pravilnika o medijskom predstavljanju i javnom oglašavanju političkih subjekata u izbornom periodu („Službeni glasnik BiH”, broj 31/24) propisano je da u periodu preuranjene kampanje političkim subjektima je zabranjen svaki oblik radnje iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje. Stavom 2. istog člana propisano je da se zabrana iz stava 1. ovog člana, odnosi na upoznavanje birača i javnosti sa programom i kandidatima političkih subjekata za predstojeće izbore.

Žalitelj nesnovano ukazuje da kako je sporna objava objavljena 01.02.2024. godine, da navedene radnje nemaju elemente preuranjene kampanje. Naime, tačno je da je prva objava na Facebook profilu NES BiH-Općinska organizacija Velika Kladuša nastala prije donošenja odluke o raspisivanju Lokalnih izbora 2024.godine (Lokalni izbori raspisani 08.05.2024. godine). Međutim stanje spisa i dokazi u istome potvrđuje pravilnost pobijane odluke CIK BiH da je došlo do kršenja odredbe člana 7.1 Izbornog zakona BiH od strane žalitelja jer je navedena objava od 01.02.2024. godine ponovo objavljena putem Facebook profila NES BiH-Općinska organizacija Velika Kladuša dana 01.06.2024. godine. U toj objavi se jasno vidi datum objavljivanja (01.06.2024. godine), kao i Logo ove političke stranke i ista objava je prema shvatanju apelacionog vijeća imala za cilj da upozna javnost i birače sa programom navedene političke stranke za predstojeće izbore. Da nije bilo ponovljanja objave sa skupa od 01.02.2024. godine u junu 2024. godine, ne bi bilo ni osnova za utvrđivanje odgovornosti navedene političke stranke. Stoga je i pravilan zaključak CIK BiH da je predmetna objava nastala u periodu prije zvaničnog početka izborne kampanje dana 01.06.2024. godine, i da ista ima sve elemente kampanje, zbog čega je Centralna izborna komisija BiH ocijenila da u smislu odredbe člana 7.1 Izbornog zakona BiH, predstavlja radnje kampanje, koje nisu dozvoljena u periodu od raspisivanja izbora do perioda zvaničnog početka izborne kampanje.

Prilikom odlučivanja o visini izrečene novčane kazne, ovaj organ je kao olakšavajuću okolnost cijenio da su u pitanju nove odredbe Izbornog zakona BiH za koje Centralna izborna komisija BiH u prethodnim izbornim ciklusima nije mogla izricati novčane kazne zbog vođenja preuranjene izborne kampanje iz kojih razloga politička stranka NES BiH-Narodni evropski savez BiH nije ni mogla biti sankcionisana, te je u skladu sa navedenim, ovoj političkoj stranci izrečena kazna u minimalnom zakonskom iznosu i da će s izrečenom novčanom kaznom postići svrha kažnjavanja.

Pravilno je CIK BiH žalitelju u skladu sa članom 6.5 Izbornog zakona BiH u cilju daljeg sprječavanja kršenja odredbe Izbornog zakona BiH kojim se zabranjuje vođenje izborne kampanje i javnog oglašavanja u periodu preuranjene kampanje. izrekla i privremenu mjeru i da politička stranka NES BIH-Narodni evropski savez BiH da ukloni sa društvene mreže Facebook (NESBIH-Općinska organizacija Velika Kladuša) sporne objave za koje je CIK BiH izrekla novčanu kaznu, te da sve pristalice i kandidate ove političke stranke za predstojeće Lokalne izbore 2024. godine, obavijesti da su dužni da se suzdrže od javnog oglašavanja i vođenja izborne kampanje u elektronskim, onlajn i štampanim medijima i putem društvenih mreža ili bilo kojeg oblika javnog oglašavanja kampanje prije zvaničnog početka izborne kampanje.

Iz svih izloženih razloga ovo vijeće je osporenu odluku, ocijenilo u potpunosti pravilnom i zakonitom, slijedom čega je žalbu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

**PREDSJEDNIK VIJEĆA
S U D I J A**

Mirsada Džindo